



XUNTA DE GALICIA
CONSELLERÍA DE CULTURA, EDUCACIÓN
E ORDENACIÓN UNIVERSITARIA



UNIÓN EUROPEA
Fondo Social Europeo
"O FSE inviste no teu futuro"



GOBIERNO
DE ESPAÑA
MINISTERIO
DE EDUCACIÓN, CULTURA
Y DEPORTE

Probas de acceso a ciclos formativos de grao medio

CMPS002

Lingua galega

Parte sociolingüística. Lingua galega



1. Formato da proba

Formato

- A proba consta de vinte cuestións tipo test.
- As cuestións tipo test teñen tres posibles respostas das que soamente unha é correcta.

Puntuación

- Puntuación: 0,50 puntos por cuestión tipo test correctamente contestada.
- Por cada cuestión tipo test incorrecta restarase 0,125 puntos.
- Polas respostas en branco non se descontará puntuación.
- No caso de marcar máis dunha resposta por pregunta considerarase como unha resposta en branco.

Duración

- O tempo necesario para a resolución deste exercicio é de aproximadamente 40 minutos.

Materiais e instrumentos que se poden empregar durante a proba

- Bolígrafo con tinta negra ou azul.



2. Exercicio

Texto 1

Ourense, a segunda cidade termal de Europa

O termalismo en Ourense está dividido entre hoteis balneario, balnearios para tratamentos sen aloxamento e termas para relax e lecer, tanto gratuítas como de pagamento. En total estímase que son máis de setenta os mananciais termais que hai na provincia e o certo é que son un gran reclamo turístico para todos aqueles que gozan tomando estas augas de recoñecidas calidades terapéuticas. Desta provincia galega flúen cada día tres millóns de litros de augas termais e mineromedicinais, unha cantidade que en Europa só supera Budapest.

Aínda que xa desde a época dos romanos as augas ourensás eran concibidas como un método de curación natural, o noso actual ritmo de vida, sumado ao paso do tempo, fai que aumente a nosa necesidade de coidar o corpo para soportarmos o estrés diario. Para iso, alén das coñecidas Burgas, fontes de augas termais que brotan a unha temperatura de entre 64 e 68 °C -cun caudal de 300 litros por minuto-, existen tamén en toda a provincia balnearios e termas nos que darse un bo baño de auga quente para curar doenzas da pel ou para relaxarse.

A piscina termal das Burgas, situada en pleno casco histórico da cidade de Ourense, actualmente é de uso gratuíto e mantén unha temperatura aproximada para o baño de 38° C. Aínda que estas gozan dun gran recoñecemento, tamén existen outras instalacións en diversos puntos da capital e da provincia. Dunha banda, a Ruta Termal do Miño está formada por 5 km de senda peonil na que se sitúan ata sete instalacións termais. Os espazos gratuítos que forman este circuíto son lugares que prometen un bo baño baixo a incommensurable beleza da súa contorna natural. Doutra banda, a auga das fontes do Tinteiro e de Reza é utilizada como bebida e para o baño parcial.

Estes mananciais que afloran nas beiras do Miño foron obxecto de contos e lendas. Estas augas son indicadas pola súa capacidade diurética, os seus beneficios para a pel ou para tratar certas patoloxías. Cada unha está destinada a un fin debido á súa diferente composición mineral, obtida grazas á composición granítica do chan. Esta é a que fai que a auga de choiva se filtre polas capas subterráneas do chan -nas que as rochas están a alta temperatura- e así se quente e adquira as súas propiedades minerais, para finalmente manar na superficie a altas temperaturas.

[<http://viajar.elperiodico.com/destinos/ourense-segunda-ciudad-termal-europa>]



1. Sinale a afirmación que é verdadeira:

- A** A provincia de Ourense conta con máis de setenta termas de pagamento.
- B** As fontes termais das Burgas de Ourense botan cada día tres millóns de litros.
- C** O río Miño posúe en Ourense un circuíto termal de varios quilómetros.

2. As Burgas de Ourense:

- A** Dispoñen dun balneario para tratamentos gratuítos sen aloxamento.
- B** Teñen piscina e fontes das que saen trescentos litros de auga por minuto.
- C** Posúen unha ruta termal de varios quilómetros ao longo do río Miño.

3. Cal destas afirmacións é FALSA?

- A** Algunhas augas termais poden utilizarse tanto para bañarse como para beber.
- B** As rochas das capas subterráneas do chan quéntase por causa da auga de choiva.
- C** As augas dos mananciais termais de Ourense xa as utilizaban os romanos.

4. A palabra “inconmensurable” (liña 18ª) significa:

- A** Non digno de conmemoración ou de ser lembrado.
- B** Capaz de conmover causando grande emoción ou sentimento.
- C** De tal magnitude ou intensidade que non se pode medir.

5. A palabra “patoloxía” (liña 23ª) é sinónimo de:

- A** Dermatite.
- B** Enfermidade.
- C** Síntoma.

6. A palabra “terapéutico” (liñas 5ª) significa ‘relativo ou pertencente’:

- A** Ao tratamento específico das enfermidades.
- B** Ao goce coa auga de baño.
- C** Ao uso e á explotación das augas medicinais.

7. O feminino de *ourensáns* é *ourensás* (liña 7ª). Cal é a serie de palabras correcta?

- A** Aldeanas, campeonas, ferrolanas, republicanas, lambonas.
- B** Artesanas, afganas, catalanas, fisterranas, abusonas.
- C** Humanas, romanas, mentiranas, asturianas, solteironas.



Texto 2

O final do Camiño

Estamos na Galiza do final do século XI. A cidade de Santiago de Compostela non é máis que unha pequena aldea e a catedral aínda non existe. É no ambiente de tensión entre reis cristiáns e musulmáns que a vila de Catoira é atacada, ligando para sempre a vida dos irmáns Gonzalo, Estevo e Pedro a aquela que é chamada a “Xerusalén de Occidente”. *O final do Camiño* é a nova serie de ficción histórica e estréase este mércores 11 de xaneiro na TVG.

Tras o ataque musulmán, Gonzalo (interpretado por Antonio Velázquez) consegue salvar a seu irmán Estevo (Guillermo Barrientos), mais non impide o asasinato da súa nai, nin o secuestro do irmán Pedro (Javier Rey) por parte dos guerreiros mouros, que o levan vivir con eles. Gonzalo e Estevo viaxan cos sobreviventes ata Santiago de Compostela, onde pola mesma época comeza a erguerse a catedral. Dez anos despois Gonzalo é xefe da garda de Diego Pais, bispo de Santiago, Estevo é aprendiz de construtor no sitio da catedral e Pedro continúa desaparecido.

A serie ten oito episodios e foi rodada ao longo de tres meses, contando cunha panoplia de paisaxes naturais, edificios históricos e escenarios interiores que se propoñen facer ao espectador viaxar no tempo. Moitas das construcións medievais non sobreviviron e outras sufriron grandes alteracións, e, por iso, a serie recorreu aos efectos especiais para mellor reproducir os espazos e ambientes do século XI.

O recinto do parque de exposicións da Feira Internacional de Galicia en Silleda albergou máis de dez mil metros cadrados de exteriores e 2.500 escenarios interiores creados por Ángel Amaro. A extensa área recrea a pequena aldea de Compostela con casas humildes, un pequeno mercado, unha taberna e un hospital. A medida que a construción da catedral vai avanzando, Compostela vaise expandindo. O interior do mosteiro de Carboeiro fai as veces da catedral, á excepción das escenas en que aparece o sepulcro do Apóstolo Santiago, filmadas na igrexa de San Pedro de Ansemil. O parque serviu tamén de escenario a outras cidades como Toledo ou Sevilla.

[<https://www.publico.pt/2017/01/11/culturaipilon/noticia/vamos-recuar-ao-tempo-em-que-a-catedral-de-santiago-se-levantou-1757818>]



8. Segundo o texto, a serie “O final do Camiño”:

- A Gravouse en Silleda, utilizando un parque de exposicións, un mosteiro e unha igrexa.
- B Filmouse en Compostela, construíndo as casas, o mercado, a taberna e o hospital.
- C Rodouse en Catoira, agás as escenas que suceden en cidades como Toledo ou Sevilla.

9. A palabra “mouro” (líña 8ª) significa:

- A Soldado que loita por un soldo.
- B Membro da cabalaría medieval.
- C Nativo do norte de África.

10. No texto, a palabra “ligar” (líña 3ª) significa:

- A Soportar con paciencia e resignación algo que molesta.
- B Establecer unha relación moi forte entre persoas e cousas.
- C Realizar accións propias de mozos, en particular as de namorar e cortexar unha persoa.

11. Cal destas afirmacións é verdadeira?

- A A serie recrea personaxes históricos e ambientes medievais anteriores ao ano 1200.
- B Santiago de Compostela xa era unha cidade antes da construción da súa catedral.
- C O sepulcro do Apóstolo Santiago atópase na igrexa de San Pedro de Ansemil.

12. Cal destas afirmacións é FALSA?

- A Moitas edificacións da Idade Media desapareceron, polo que houbo que recrealas.
- B A expansión da cidade de Compostela foi paralela á construción da súa catedral.
- C O tres irmáns protagonistas residen sempre en Compostela ao longo da serie.

13. Segundo o texto, Antonio, Guillermo e Javier son:

- A Os dobradores que puxeron as súas voces para a versión en galego da TVG.
- B Os actores que dan vida aos personaxes protagonistas da serie de televisión.
- C Os guionistas que escribiron os diálogos interpretados polos actores principais.

14. No sentido en que aparece no texto, unha “panoplia de paisaxes naturais” (líñas 12ª-13ª) é un:

- A Conxunto amplo e variado de espazos dun territorio.
- B Grupo de vexetais que crecen nun lugar.
- C Terreo cuberto de vexetación espontánea que pode estar poboado de árbores.



15. Cal é a serie de afirmacións correcta?

- A** O grupo consonántico culto -ct- mantense nalgúns cultismos: *doctor, doctrina, doctoramento, rector, rectorado, rectoral, rectoría, secta* etc, pero non se mantén nas palabras *suxetar e suxeto*.
- B** Algunhas voces moi populares, así como os seus derivados, deben escribirse con “x”: *excavar, excavación, excavadora, extender, extrañar, extraño, extrañeza, extrañamento, extranxeiro, extranxeiría, extranxeirismo*.
- C** A diérese úsase coa letra “i” na primeira e segunda persoas de plural dos imperfectos de indicativo (copretéritos) dos verbos rematados en -aer (caer), -oer (doer), -aír (saír) e -oír (oír): *caíamos, caíades, doíamos, doíades, saíamos, saíades* etc.

16. Cal é a serie de palabras correctamente acentuada?

- A** Egoísmo, saín, españoís, traía, prohíbo.
- B** Constituíu, papeis, carácter, ruído, canons.
- C** Ademáis, mobil, prexuizo, biceps, dólmenes.

17. Cal é a serie de emparellamentos correcta?

- A** Filo- → sabedoría; fisio- → terra; hidro- → río; paleo- → pobo.
- B** Quilo- → mil; rino- → nariz; taqui- → rápido; topo- → lugar.
- C** Xenos- → madeira; tetra- → cinco; sidero- → lume; tele- → móbil.

18. Cal é a serie de palabras correcta?

- A** Abelá, chuvasco, birollo, ouvear, rebentar, xavelina.
- B** Gabacho, valeiro, esbelto, vizcaíno, pabellón, vidueiro.
- C** Obiedade, orvallo, Esteban, maravilla, cobarde, volvoreta.

19. Cal é a serie de palabras ortograficamente correcta?

- A** Adesivo, exalar, exhaustivo, exortar, inerente, filarmónica.
- B** Exhaustivo, exhuberante, inherente, truhán, exhalar, bahía.
- C** Exorbitante, exuberante, truán, baía, vaído, velaí.

20. Cal destes tempos verbais é un pluscuamperfecto de indicativo (antepretérito)?

- A** Viñera, viñeras, viñera, viñeramos, viñerades, viñeran.
- B** Maniría, manirías, maniría, maniríamos, maniríades, manirían.
- C** Abolise, abolises, abolise, abolísemos, abolísedes, abolisen.



3. Solución para as preguntas tipo test

Nº	A	B	C	
1			X	
2		X		
3		X		
4			X	
5		X		
6	X			
7			X	
8	X			
9			X	
10		X		
11	X			
12			X	
13		X		
14	X			
15			X	
16		X		
17		X		
18	X			
19			X	
20	X			
Nº de respostas correctas (C)				
Nº de respostas incorrectas (Z)				
Puntuación do test = $C \times 0,5 - Z \times 0,125$				

Nas preguntas de test, por cada resposta incorrecta descontaranse 0,125 puntos. As respostas en branco non descontarán puntuación